

✱ ЛЫДЗИСЬКЫ, ИЖКАР!

# Книга басытом талонэн

Мария ВЕКШИНА

**1-тй-3-тй куару-сёнэ Ижын 5-тйзэ ни радъяськоз «Лыдзиськы, Ижкар!» фестиваль. Аслэсьтыз ужрадъёссэ дасяз «Удмурт дунне» газет но.**

3 нунал чоже Шор площадын ужалоз «Удмурт дунне» газетлэн азбарез. Татын ортчозы кылбур лыдзонъёс, литература мастер-классъёс, удмурт писательёсын пумиськонъёс, газетмылы гожтиськон. Улонэ пычалоз эшшо одйг тунсыко малпанмы но: гожтиськисъёсмы понна ми ортчотом фотосессия, озьыен, та нуналъёсы газетмылы гожтиськисъёслэн тусъёсы потозы «Удмурт дунне» газетлэн бамъёсаз. Гажаса отиськом азбарамы!

«Лыдзиськы, Ижкар!» фестиваль туэ вуттоз совето вакытёсы - соку Россиын уло вал дуннеысь тужгес но лыдзиськис адымиос. Чошен ми тодамы ваём со вакытысь яратоно книгаосты, лисъялом тужгес но лыдзымон журналъёсты, черодын сылом дефицит книгаослы. Одйгъёссэ дунин басытыны луоз, мукетъёсэ - талонэн. Татчы вуозы Москваысь но шаерысьтымы 20-лэсь уно книга поттисьёс.

Фестивальлэн нырысетй нуналаз ик калык пумиськоз шаерысьтымы 3 тодмо литераторъёсын - Вячеслав Ар-Сергиен,



Сергей Гулинэн но Сергей Жилинэн. Ваньзы соос пöртэмесь, но огазая одйгез - удмурт шаер но одйг вакыт.

- Вордйськем палъестэ, солэсь историзэ уд яратиськы ке, озьыен, тон уд яратиськы астэ, - вера Сергей Жилин. - Но историз но историлы дышетены, мон понна, пöртэм верамъёс. Та сярсы ик верало мынам кылбуръёсы, киносы, очеркъёсы.

Сергей Гулин но шаер сярсы туж лэчыт кылбуръёс гожъя: политикае но зымылэ.

Фестивальлэн дуно куноосыз - зуч писательёс - Александр Кабаков но Владимир Сотников. 2011-тй арын Александр Кабаков Евгений Попов журналистэн чош гожтйз «Аксёнов» тодэ ваёнъёссэ. Отын тодмо писатель Василий Аксёнов лыдзисъёслы выль сямен усьтиське. Александр Кабаковлэн мукетаз романаз - «Всё поправимо» - одйг адымилэн сюресаз пыр возматэмын быдэс поколенилэн улонэз: Сталин вакытысь пичи дыр, тузй «оттепель» дыръя быдэ вуон но 90-тй аръёсы пересмон. Та кни-

«Лыдзиськы, Ижкар!» фестивалын котькуд мылкыд карись быгатоз лыдзыны аслэсьтыз чуръёссэ.

га пусъемын «Большая книга» но Аполлон Григорьев нимо премиосын.

Владимир Сотников тросгес гожъяське нылпиос понна. «Чёрный котёнок», «Мой первый детектив», «Детский клуб приключений» - оглом гожтйз 30 пала повестъёс. Лыдзисез со бордаз кыске приключениосыныз, чебер кылыныз. Вань суредъёсыз мылкыдъёс бордысь кылдо кадэ. 0+ ✱✱✱

✱ ЛЫДЗИСЬКОННИ

## Поскрёбьшевлэн кузьымез

Наталья САМСОНОВА

**Удмуртиысь калык кылбурчилэн Олег Поскрёбьшевлэн чыжкы-выжкыосыз солэсь люкам книгаоссэ Национальной библиотекалы кузьмазы.**

Удмуртиысь зуч кылбурчи но публицист Олег Поскрёбьшев вордйськемын 1930-тй арын 10-тй июле Кез ёросысь Бани гуртын. Кылбуръёсаз со данъя Удмурт шаерысь чебер инкуазез, калыкез. Тросэз ужтёсыз удмурт, украин, коми, немец но мукет кылтёсы берыктълэмын. Огъя 27 книгаез печатламын.

Олег Поскрёбьшев дораз бадзым библиотека люкам. Сое тус-тас каронлэсь утён понна но лыдзис доры вуттон выльысь, О. Поскрёбьшевлэн кузпалыз Зоя Ивановна но 2 нылтёсыз книгаоссэ Национальной библиотекалы кузьмазы.

Библиотекаын ужась Надежда Пронина верамъя, кылбурчи 50 арлэсь кемегес люкам та книгаоссэ. Соос пöлын трос Удмурт шаерысь чеберлыко литература, озьы ик Россиысь калыкъёслэн поэзизы но прозазы, кунгож сьöрысь авторъёслэн ужтёссы, литературоведческой книгаос но мукет. Уката но трос кылбур бичетъёс, кылсярысь, А. Пушкинлэн, Ю. Лермонтовлэн.

Оглом 1000-лэсь ятыр книгаос вуизы фондазы. Соос пöлысь 200-лэсь тросаз книгаосын вань авторъёслэн кинюртэмзы но Олег Поскрёбьшевлы зеч кылтёсы, кылсярысь, Сергей Викулов, Лев Опанин, Флор Васильев кылбурчиослэн. О. Поскрёбьшевлэн библиотекаез Национальной библиотекалэн фондаз нимаз коллекция сямен интыямын луоз.

## Сюрес вылын эн мöзмы

**Национальной библиотека «Удмуртиысь электрон библиотека: сюрес вылэ книга» проектсэ улонэ пычатэ.**

Аспöртэм пичигес тумба - мобильной электрон библиотека - Ижысь чугун сюрес вокзалэ интыяскиз. Отчы пыртэмын шаерысьтымы писательёслэн книгаоссы: чеберлыко литература произведенийос, Удмуртилэн историзъя, фольклоръя но чеберлыкъя книгаос. Котькудйз мылкыд карись тумбаын возматэм QR-кодъя смартфонэ яке планшетэ быръем книгаосты дунтэк кыскыны быгатэ. ✱✱✱

✱ ЗЕЧ УЖ

## Кин юрттоз пичи библиотекалы?

Мария ИВАНОВА

**Выль книга, газет-журнал басытыны библиотекаослы уксё öжыт висъяське. Вань амал: biblio.planeta.ru вотэсбамын котькуд адыми быгатэ библиоте-каослы юрттон выльысь уксё кельтыны.**

Пичи дыръям яратисько вал «Мурзилка», «Мишка» но мукет журналъёсты, наукаен герзаськем книгаосты учкылыны. Тросэз адымиос библиотекасын газет-журналъёсты лыдзыса быдэс нуналъёсын но пукыло. Но арысь аре журналъёслы гожтиськыны секытгес луэ, шуо библиотекаын ужасьёс, «Удмурт дунне»

газетлы но гожтиськыны уксё уг тырмы ни.

- Быдэс арлы милемлы Можга кар администрация висъя 200 сюрс манет, со тырме ёросысь 4 библиотекаосы 70-лэсь уно дунтэм газет-журналъёслы гожтиськыны. Öжыт-а со? Куд-ог ёросъёсын солэсь но ичигес висъяло, - вера Можга ёрос библиотекаен кивалтйсь Елена Зворыгина. - Журналъёсты адымиос туж лыдзö, потэ на вылэм гожтиськеммы литература зöк журналъёслы.

Та югдурен тодмо Россиысь библиотекаослэн ассоциациязы. Библиотекаослы юрттон выльысь, со, Кун Думалэн юрттэменыз, улонэ пычатэ «БиблиоРодина» проектсэ. Котькуд адыми biblio.planeta.ru вотэсбаме

пырыса, быгатэ бырйыны библиотекаез но лэсьтыны солы подписка. Озы Россиысь библиотекаосы вуыны быгатозы таёе тодмо газет-журналъёс: «Наука и жизнь», «Машины и механизмы», «Вокруг света», «Юный техник»... Оглом вераса, наукаен герзаськем дуно журналъёс.

- Та проект городъёсты но гуртъёсты азинтыны юрттэ. Будйсь егитъёслы кулэ визьмо журналъёс, сотэк ми ыштиськом вуоно инженеръёсты, академикъёсты, тодосчиосты, - вера «Наука и жизнь» журналлэн вальтйсь редакторез Елена Лозовская.

Та дырлы люкамын ни 670 сюрс манет, лэсьтэмын 270 подписка. Проектэ пырысько 6 сюрс 422 библио-

текаос, соос пöлын Можга, Иж городъёсысь, Кизнер, Дæри но куд-ог мукет ёросъёсысь лыдзиськонниос. Но сюриз ни меда соослы меценат? Можга ёросысь Н. Байтеряков нимо библиотека «БиблиоРодина» проектэ нырысетй нуналысен ик пырыське. Но библиотекалы журналъёсты гожтисьёс öз сюре на. Сыёе ик югдур Удмуртиысь йöскалык библиотекаын но. Мар веранэз мукет пичигес ёросъёсысь книга юртъёс сярсы.

Зэм, ми дышеммын öвöл на таёе амаллы, уксемес лыдъяськом на. Но öжыт öвöл ни благотворительностен вырысьёс но. Озьыен, оскиськом: азыланаз библиотекаосы газет-журналъёслы гожтиськисъёслэн лыдзы будоз. ✱✱✱